

საქართველოს ტექნიკური უნივერსიტეტის სტუდენტური

თვითმმართველობის დებულება

2008 წ.

## მუხლი 1. ზოგადი დებულებები

- 1.1. საქართველოს ტექნიკური უნივერსიტეტის სტუდენტური თვითმმართველობა (შემდგომში სტუდენტური თვითმმართველობა) არის უნივერსიტეტის სტუდენტების მიერ, „უმაღლესი განათლების შესახებ“ საქართველოს კანონის მოთხოვნათა დაცვით. საყოველთაო, თანასწორი, პირდაპირი და ფარული არჩევნების წესით ფაკულტეტებზე არჩეულ სტუდენტთა წარმომადგენლობითი ორგანო.
- 1.2. სტუდენტური თვითმმართველობის სამართლებრივი სტატუსი განისაზღვრება საქართველოს კანონით “უმაღლესი განათლების შესახებ”, უნივერსიტეტის წესდებით და წინამდებარე დებულებით.
- სტუდენტური თვითმმართველობის საქმიანობა ხორციელდება ამ დებულების შესაბამისად.
- 1.3. სტუდენტური თვითმმართველობა არის უნივერსიტეტის შემადგენლობაში შექმნილი სტუდენტური თვითმმართველობის სისტემა, რომელიც კანონდებლობით გათვალისწინებული შემთხვევების გარდა, უნივერსიტეტის ადმინისტრაციისაგან დამოუკიდებლად ახორციელებს მის უფლებამოსილებას, როგორც უნივერსიტეტის შიგნით, ასევე მის ფარგლებს გარეთ. სტუდენტური თვითმმართველობა არ წარმოადგენს იურიდიულ პირს.
- 1.4. სტუდენტური თვითმმართველობის არჩევნები ტარდება ოთხ წელიწადში ერთხელ.
- 1.5. სტუდენტურ თვითმმართველობას უნივერსიტეტის ადმინისტრაციასთან შეთანხმებით, აქვს საკუთარი ბეჭედი, შტამპი, საანგარიშსწორებო, სავალუტო და სხვა ანგარიშები საბანკო დაწესებულებებში და დებულებით გათვალისწინებული სხვა ატრიბუტიკა.
- 1.6. უნივერსიტეტის ადმინისტრაციას უფლება არ აქვს რაიმე სახით ჩაერიოს ან ზემოქმედება მოახდინოს სტუდენტური თვითმმართველობის საქმიანობაზე და მის დამოუკიდებლობაზე.
- 1.7. სტუდენტური თვითმმართველობის საქმიანობის შესახებ ინფორმაცია საჯაროა და ხელმისაწვდომი ყველა დაინტერესებული პირისათვის.
- 1.8. თვითმმართველობის მისამართი: საქართველო, 0138, ქ. თბილისი, კოსტავას №77 სტუ-ის ადმინისტრაციული კორპუსი.

## მუხლი 2. სტუდენტური თვითმმართველობის მიზნები

სტუდენტური თვითმმართველობის მიზნებია:

- 2.1. დაიცვას და წარმოადგინოს სტუდენტების ინტერესები უნივერსიტეტის მართვის ორგანოებთან ურთიერთობაში და საჭიროების შემთხვევაში უზრუნველყოს უნივერსიტეტის თითოეული სტუდენტის ყოველმხრივი დაცვა არასაუნივერსიტეტო ურთიერთობებში.
- 2.2. ხელი შეუწყოს სტუდენტებს უფლებებისა და თავისუფლებების, მათი კანონიერი ინტერესების დაცვაში, განმტკიცებასა და პრაქტიკულ რეალიზაციაში.
- 2.3. დაეხმაროს სტუდენტებს მაღალკვალიფიციური განათლების მიღებაში, თვითრეალიზებასა და დამოუკიდებელი აზროვნების ჩამოყალიბებაში.
- 2.4. დახმარება გაუწიოს სტუდენტებს სწავლის პერიოდში, პროფესიული უნარჩვევების გამომუშავებაში და კონკურენტუნარიან პროფესიონალად ჩამოყალიბებაში. დახმარება გაუწიოს უნივერსიტეტის ადმინისტრაციას სასწავლო პროცესის დახვეწაში.
- 2.5. ხელი შეუწყოს უნივერსიტეტის ინტეგრაციას ევროპულ საგანმანათლებლო სივრცეში და მაქსიმალურად უზრუნველყოს ამ პროცესში სტუდენტთა მონაწილეობა; ქართველ და არაქართველ სტუდენტებს შორის მჭიდრო ურთიერთობების დამყარებას.
- 2.6. ხელი შეუწყოს სტუდენტებში სამართლებრივი თვითშეგნების დონისა და კანონისადმი პატივისცემის ამაღლებას; დახმარება გაუწიოს საქართველოში

დემოკრატიული ღირებულებების დამკვიდრებას და სამოქალაქო საზოგადოების ჩამოყალიბებას.

2.7. შექმნას ოპტიმალური პირობები სტუდენტთა დასვენების, ყოფის, შრომითი მოღვაწეობის და სხვა მოთხოვნების დასაკმაყოფილებლად, გაამრავალფეროვნოს სტუდენტური ცხოვრება.

### **მუხლი 3. სტუდენტური თვითმმართველობის უფლებამოსილება**

3.1. სტუდენტური თვითმმართველობა თავისი კომპეტენციის ფარგლებში:

- ა) ხელს უწყობს სტუდენტთა უფლებების დაცვას;
- ბ) ირჩევს წარმომადგენლებს ფაკულტეტის საბჭოში;
- გ) სასწავლო პროცესთან და მატერიალურ საკითხებთან დაკავშირებულ პრობლემებს წყვეტს უნივერსიტეტის ადმინისტრაციასთან თანასწორუფლებიანი თანამშრომლობის საფუძველზე;
- დ) შეიმუშავებს წინადადებებს ფაკულტეტის ან უმაღლესი საგანმანათლებლო დაწესებულების მართვის სისტემისა და სწავლების ხარისხის გასაუმჯობესებლად, რომელთაც წარუდგენს ფაკულტეტის საბჭოს, წარმომადგენლობით საბჭოსა და აკადემიურ საბჭოს;
- ე) პერიოდულად ახდენს აკადემიური პერსონალის მუშაობის შეფასებას;
- ვ) უზრუნველყოფს სტუდენტთა მონაწილეობას უმაღლესი საგანმანათლებლო დაწესებულების მართვაში;
- ზ) წინამდებარე მიზნების მისაღწევად ახორციელებს უმაღლესი განათლების შესახებ კანონით, უნივერსიტეტის წესდებითა და ამ დებულებით გაუთვალისწინებლ სხვა უფლებამოსილებას.

3.2. სტუდენტური თვითმმართველობა, უფლებამოსილია მე-3 მუხლში მითითებული მიზნების განსახორციელებლად მოაწიოს შესაბამისი შეხვედრები, დებატები, დისკუსიები, ტრენინგები, ინტელექტუალური თამაშები, საგანმანათლებლო, ლიტერატურული, სპორტული, კულტურული, გასართობი, სამეცნიერო და კანონით ნებადართული სხვა სახის ღონისძიებები. სტუდენტური თვითმმართველობა უფლებამოსილია განახორციელოს საქველმოქმედო საქმიანობა.

3.3. სტუდენტური თვითმმართველობა თანამშრომლობს სხვა საუნივერსიტეტო, სამთავრობო და არასამთავრობო ორგანიზაციებთან, აგრეთვე გაერთიანებებთან, სახელმწიფო და საერთაშორისო ორგანიზაციებთან.

3.4. სტუდენტურ თვითმმართველობას გააჩნია მუდმივი კავშირი საქართველოს და უცხოეთის უმაღლეს სასწავლებლების სტუდენტურ ორგანიზაციებთან და საერთაშორისო სტუდენტურ გაერთიანებებთან.

### **მუხლი 4. სტუდენტური თვითმმართველობის წევრობა**

4.1. სტუდენტური თვითმმართველობის წევრია ის სტუდენტი, რომელიც საარჩევნო დებულებით დადგენილი წესით არჩეული იქნება სტუდენტურ თვითმმართველობაში.

4.2. სტუდენტური თვითმმართველობის სისტემაში არჩეული შეიძლება იყვნენ მხოლოდ უნივერსიტეტის სტუდენტები.

4.3. სტუდენტური თვითმმართველობის წევრის უფლებამოსილების ვადა განისაზღვრება 4 წლით.

4.4. სტუდენტური თვითმმართველობის წევრის უფლებამოსილება იწყება მისი არჩევის მომენტიდან და წყდება:

- ა) პირადი განცხადების საფუძველზე;
- ბ) უნივერსიტეტში ადმინისტრაციულ თანამდებობაზე დანიშვნის შემთხვევაში;
- გ) სტუდენტური პარლამენტის გადაწყვეტილებით, თუ იგი აღარ არის სტუდენტი და ექვსი თვის განმავლობაში არ აღუდგენია აღნიშნული სტატუსი;

დ) სტუდენტური პარლამენტის გადაწყვეტილებით თუ იგი უხეშად დაარღვევს უნივერსიტეტის ან სტუდენტური თვითმმართველობის წესდებას;

ე) ქმედუუნაროდ გამოცხადების ან უზოუკლოდ დაკარგვის შემთხვევაში.

4.5. სტუდენტურ თვითმმართველობას შეიძლება ჰყავდეს საპატიო წევრი, რომელიც არ არის უნივერსიტეტის სტუდენტი და რომელზედაც არ ვრცელდება ამ დებულებით გათვალისწინებული ნორმები. საპატიო წევრი არ სარგებლობს ხმის უფლებით.

4.6. თვითმმართველობის წევრის უფლებამოსილების ვადაზე ადრე შეწყვეტის შემთხვევაში თვითმმართველობის წევრი ხდება ის პირი, რომელმაც დააგროვა ხმათა მეტი, მაგრამ თვითმმართველობის წევრად არჩევისათვის არასაკმარისი რაოდენობა უკანასკნელ არჩევნებში. თანაბარი ხმების მქონე პირთაგან თვითმმართველობის წევრი შეირჩევა პარლამენტის მიერ ჩატარებული წილისყრით. ასლად არჩეული თვითმმართველობის წევრი უფლებამოსილებას ახორციელებს გამოკლებული წევრის უფლებამოსილების დარჩენილი პერიოდის განმავლობაში. ასეთის არარსებობის შემთხვევაში სტუდენტური თვითმმართველობის პარლამენტი უფლებამოსილია არჩევნებამდე აირჩიოს თვითმმართველობის წევრი.

## **მუხლი 5. თვითმმართველობის წევრის უფლებები და მოვალეობები**

5.1. თვითმმართველობის წევრი უფლებამოსილია:

ა) მონაწილეობა მიიღოს თვითმმართველობის მართვის ორგანოების მუშაობაში;

ბ) იქონიოს სათათბირო ხმის უფლება;

გ) წესდებით განსაზღვრული მიზნების განსახორციელებლად წინადადებებით მიმართოს თვითმმართველობის მართვის ორგანოებს;

დ) აირჩიოს და იყოს არჩეული თვითმმართველობის მართვის ორგანოებში;

ე) მიიღოს მონაწილეობა სტუდენტური თვითმმართველობის მიერ ორგანიზირებულ ღონისძიებებში ან თავად შეიმუშაოს და განახორციელოს ისინი;

ვ) მიიღოს ყოველგვარი ინფორმაცია სტუდენტური თვითმმართველობის ორგანოებიდან მათი საქმიანობის შესახებ;

ზ) მიიღოს მხარდაჭერა სტუდენტური თვითმმართველობისაგან საკუთარი უფლებებისა და ინტერესების დასაცავად;

თ) განახორციელოს მოქმედი კანონმდებლობითა და დებულებით მისთვის მინიჭებული სხვა უფლებამოსილებანი.

5.2. თვითმმართველობის წევრი ვალდებულია:

ა) შეასრულოს სტუდენტური თვითმმართველობის დებულებით მასზე დაკისრებული მოვალეობები;

ბ) დაიცვას სტუდენტური თვითმმართველობის სახელი, ავტორიტეტი და ქონება;

გ) ხელი შეუწყოს სტუდენტსა და უნივერსიტეტის მართვის ორგანოებს შორის ჯანსაღი ურთიერთობების ჩამოყალიბებას.

## **მუხლი 6. სტუდენტური თვითმმართველობის მართვის ორგანოები**

თვითმმართველობის მართვის ორგანოებია:

ა) თვითმმართველობის წევრთა საერთო კრება;

ბ) სტუდენტური გამგეობა (პარლამენტი);

გ) თვითმმართველობის პრეზიდენტი;

დ) თვითმმართველობის ვიცე-პრეზიდენტები (აღმასრულებელი კომიტეტი);

ე) სარევიზიო კომისია.

## მუხლი 7. თვითმმართველობის წევრთა საერთო კრება

7.1. თვითმმართველობის წევრთა საერთო კრება წარმოადგენს სტუდენტური თვითმმართველობის უმაღლეს წარმომადგენლობით ორგანოს, რომელიც შედგება სტუდენტურ თვითმმართველობაში არჩეული ყველა წევრისაგან.

7.2. თვითმმართველობის წევრთა საერთო კრება იკრიბება წელიწადში ერთხელ.

თვითმმართველობის წევრთა საერთო კრების ჩატარების თარიღის და შესაბამისი დღის წესრიგის შესახებ თვითმმართველობის წევრებს ეცნობება კრების ჩატარებამდე არა უგვიანეს ერთი კვირით ადრე.

7.3. თვითმმართველობის წევრთა საერთო კრება უფლებამოსილია თუ მას ესწრება წევრთა სიითი შემადგენლობის უმრავლესობა.

7.4. თვითმმართველობის წევრთა საერთო კრება უფლებამოსილია:

ა) სრული შემადგენლობის უმრავლესობით აირჩიოს თვითმმართველობის პრეზიდენტი;

ბ) სრული შემადგენლობის 2/3 გადაწყვეტილებით შეიტანოს ცვლილებები დებულებაში.

7.5. თვითმმართველობის წევრთა საერთო კრების რიგგარეშე მოწვევის უფლება აქვს სტუდენტური თვითმმართველობის პრეზიდენტს, სტუდენტური პარლამენტის წევრთა სიითი შემადგენლობის 2/3-ს, ან თვითმმართველობის წევრთა 1/4.

## მუხლი 8. სტუდენტური გამგეობა (პარლამენტი)

8.1. სტუდენტური თვითმმართველობის წარმომადგენლობითი ორგანოა სტუდენტური გამგეობა (პარლამენტი), რომელიც შედგება ფაკულტეტის თვითმმართველობის წევრებიდან არჩეული დელეგატებისაგან, რომლებიც ირჩევიან შემდეგი შესაბამისობით. თითოეული ფაკულტეტიდან ერთი წარმომადგენელი, მათი არჩევის წესს განსაზღვრავს გამგეობა, რომლის სხდომებსაც ხელმძღვანელობს პრეზიდენტი.

8.2. პარლამენტი განსაზღვრავს სტუდენტური თვითმმართველობის ძირითად პრიორიტეტებსა და ამოცანებს წლის განმავლობაში, საფაკულტეტო და აღმასრულებელი კომიტეტების საქმიანობის ძირითად პრინციპებსა და მიმართულებებს.

8.3. პარლამენტის სტრუქტურა და მუშაობის წესი განისაზღვრება პარლამენტის რეგლამენტით.

8.4. სტუდენტური პარლამენტის სხდომა უფლებამოსილია, თუ მას ესწრება წევრთა სიითი შემადგენლობის ნახევარზე მეტი, ხოლო გადაწყვეტილება მიიღება დამსწრეთა უმრავლესობით, მაგრამ არა ნაკლებ სრული შემადგენლობის 1/3-სა, გარდა ამ დებულებით გათვალისწინებული შემთხვევისა. რიგგარეშე სხდომის მოწვევა შეუძლია სტუდენტური თვითმმართველობის პრეზიდენტს, ან სტუდენტური პარლამენტს წევრთა 1/3-ის წერილობითი მოთხოვნის საფუძველზე.

8.5. სტუდენტური პარლამენტი უფლებამოსილია:

ა) განსაზღვროს წლის პრიორიტეტები;

ბ) განიხილოს და საჭიროების შემთხვევაში დაამტკიცოს თვითმმართველობის საქმიანობისათვის აუცილებელი პროგრამები და პროექტები, რომელსაც მას წარუდგენენ თვითმმართველობის წევრები;

დ) საჭიროების შემთხვევაში პრეზიდენტის წარდგენით შექმნას დროებით კომისიები, რომლებიც თავის უფლებამოსილებას წყვეტენ საკითხის ამოწურვის შემდეგ;

ე) მიიღოს დებულება და შეიტანოს ცვლილებები დელეგატა სრული შემადგენლობის 2/3-ის თანხმობით.

ზ) პარლამენტი პრეზიდენტის წარდგინებით ამტკიცებს და აუქმებს დეპარტამენტებს, რომლის მუშაობასაც აკონტროლებს ვიცე-პრეზიდენტი.

თ) წყვეტს სხვა საკითხებს თავისი კომპეტენციის ფარგლებში.

8.6 სტუდენტური გამგეობა მთლიანი შემადგენლობის 2/3 გადაწყვეტილებით შესაბამისი აქტით უფლებამოსილია მიიღოს დადგენილება, უნივერსიტეტის სტუდენტური თვითმმართველობის შემდგომი არჩევის წესის, ფაკულტეტის საბჭოში თვითმმართველობის წევრი სტუდენტების არჩევის წესის და სტუდენტური თვითმმართველობის გამგეობის წევრების არჩევის წესის შესახებ.

## მუხლი 9. თვითმმართველობის პრეზიდენტი

9.1. თვითმმართველობის პრეზიდენტი აირჩევა სტუდენტური თვითმმართველობის დელეგატების მიერ 2 წლის ვადით, სტუდენტურ თვითმმართველობაში არჩეულ დელეგატთა სიითი შემადგენლობის ნახევარზე მეტით.

9.2. თვითმმართველობის პრეზიდენტობის კანდიდატის დასახელების უფლება აქვს თვითმმართველობის წევრთა სრული შემადგენლობის მინიმუმ 1/5.

9.3. იმ შემთხვევაში, თუ ვერც ერთმა კანდიდატმა ვერ მოაგროვა ხმათა საკმარისი რაოდენობა, ინიშნება მეორე ტური იმ პირველი ორი კანდიდატისთვის, რომელმაც ყველაზე მეტი ხმათა რაოდენობა დააგროვა. იმ შემთხვევაში, თუ მეორე ტურშიც ვერც ერთმა კანდიდატმა ვერ დააგროვა საკმარისი ხმათა რაოდენობა, ხუთი დღის ვადაში ინიშნება ხელახალი არჩევნები.

9.4. თვითმმართველობის პრეზიდენტი:

- ა) წარმოადგენს თვითმმართველობას სტუ-ს ხელმძღვანელი ორგანოების წინაშე;
- ბ) კოორდინაციას უწევს თვითმმართველობის ორგანოთა მუშაობას;
- გ) იწვევს სტუდენტურ პარლამენტის სხდომებს;
- დ) სტუდენტური პარლამენტს დასამტკიცებლად წარუდგენს აღმასრულებელ კომიტეტში შემავალი დეპარტამენტების თავმჯდომარეების კანდიდატურებს;
- ე) სტუდენტურ პარლამენტს დასამტკიცებლად წარუდგენს ვიცე-პრეზიდენტების კანდიდატურას;
- ვ) წარმოადგენს სტუდენტურ თვითმმართველობას ორგანიზაციებთან, უწყებებთან, მესამე პირებთან ურთიერთობის დროს;
- ზ) კვარტალში ერთხელ წარუდგენს სტუდენტურ პარლამენტს გაწეული საქმიანობის შესახებ ანგარიშს;
- თ) იწვევს თვითმმართველობის წევრთა საერთო კრებას.

9.5. პრეზიდენტის უფლებამოსილება ვადად შეწყდება:

- ა) პირადი განცხადების საფუძველზე;
- ბ) უნივერსიტეტში ადმინისტრაციულ თანამდებობაზე დანიშვნის შემთხვევაში;
- გ) ქმედითუნარიოდ გამოცხადების ან უგზოუკლოდ დაკარგვის შემთხვევაში;
- დ) წესდების ან საქართველოს კანონმდებლობის უხეში დარღვევის შემთხვევაში, იმპიჩმენტის პროცედურით, რომლის დაწყებისათვის აუცილებელია სტუდენტური თვითმმართველობის დელეგატების სიითი შემადგენლობის 2/3-ის თანხმობა.

9.6. პრეზიდენტის იმპიჩმენტის პროცედურა იწყება პრეზიდენტის მიერ საქართველოს კანონმდებლობის ან ამ დებულების უხეში დარღვევის შემთხვევაში, რომლის დაწყების უფლება აქვს სტუდენტური თვითმმართველობის საერთო კრების სიითი შემადგენლობის 2/3-ს. აღნიშნულის შემდეგ იქმნება საინჰიპიტო დროებითი კომისია, რომელიც უფლებამოსილია აწარმოოს გამოძიება და ერთი თვის მანძილზე წარუდგინოს სტუდენტურ თვითმმართველობის საერთო კრებას შესაბამისი დასკვნა, რომელსაც ასევე ეყრება კენჭი და ჩაითვლება დამტკიცებულად თუ მას მხარს დაუჭერს სტუდენტური თვითმმართველობის წევრთა საერთო კრების სიითი შემადგენლობის 3/4-ი.

9.7. პრეზიდენტის უფლებამოსილების შეწყვეტის შემთხვევაში მისი უფლებამოსილება ავტომატურად გადაეცემა ვიცე-პრეზიდენტს, რომელიც ხელმძღვანელობს აღმასრულებელ კომიტეტს.

ა) სტუდენტურ თვითმმართველობას პრეზიდენტის უფლებამოსილების ხელშეწყობის მიზნით, ჰყავს ვიცე-პრეზიდენტი და აღმასრულებელი კომიტეტი.

- ბ) სტუდენტური თვითმმართველობის პრეზიდენტი პარლამენტს დასამტკიცებლად წარუდგენს ვიცე-პრეზიდენტის კანდიდატს.
- გ) ვიცე-პრეზიდენტი დამტკიცებულად ჩაითვლება, თუ მას მხარს დაუჭერს სტუდენტური პარლამენტის წევრთა სიითი შემადგენლობის 2/3.
- დ) ვიცე-პრეზიდენტი ხელს უწყობს სტუდენტური თვითმმართველობის პრეზიდენტის უფლებამოვალეობებს, უნივერსიტეტის საქმეებს საფაკულტეტო დონეზე და უზრუნველყოფს მათ კოორდინაციას.
- ე) ხელს უწყობს სტუდენტური თვითმმართველობის პრეზიდენტის უფლებამოვალეობებს აღმასრულებელ კომიტეტთა საქმიანობაში და უზრუნველყოფს მათ კოორდინაციას.
- ვ) პრეზიდენტის თანხმობის შემთხვევაში, საკუთარი უფლებამოსილების განსახორციელებლად, ვიცე-პრეზიდენტს აქვთ უფლება ხელი მოაწეროს და გააფორმოს ფინანსური და იურიდიული დოკუმენტები.
- ზ) ვიცე-პრეზიდენტების უფლებამოსილების შეწყვეტა შეუძლია პარლამენტის სიითი შემადგენლობის 2/3-ს თუ მის საკითხს დააყენებს პრეზიდენტი.

### **მუხლი 10. აღმასრულებელი კომიტეტი და დეპარტამენტები**

- 10.1. თვითმმართველობის მიზნების შესასრულებლად გამგეობის გადააწყვეტილებით იქმნება დეპარტამენტები.
- 10.2. დეპარტამენტების თავმჯდომარეების კანდიდატურებს წარადგენს თვითმმართველობის პრეზიდენტი, ხოლო ამტკიცებს სტუდენტური პარლამენტი. გადააწყვეტილება მიიღება სტუდენტური პარლამენტის სიითი შემადგენლობის ნახევარზე მეტით.
- 10.3. დეპარტამენტების თავმჯდომარეები ქმნიან აღმასრულებელ კომიტეტს, რომელსაც ხელმძღვანელობს ვიცე-პრეზიდენტი.
- 10.4. აღმასრულებელი კომიტეტი თავისი კომპეტენციის ფარგლებში:
  - ა) შეიმუშავებს დეპარტამენტების მუშაობის საერთო პოლიტიკას;
  - ბ) წარადგენს წინადადებებს კონკრეტული დეპარტამენტის მუშაობის გაუმჯობესების თაობაზე;
  - გ) ისმენს დეპარტამენტების თავმჯდომარეების ყოველთვიურ ანგარიშს;
  - დ) წარუდგენს თვითმმართველობის პრეზიდენტს ყოველთვიურ ანგარიშს გაწეული საქმიანობის შესახებ.

### **მუხლი 11. საფაკულტეტო სტუდენტური თვითმმართველობა**

- 11.1 საფაკულტეტო სტუდენტური თვითმმართველობა არის თვითმმართველობის შიდა ორგანიზაციული წარმონაქმნი, რომელიც ფორმირდება სტუ-ის ინსტიტუტების და ფაკულტეტების ბაზიდან.
- 11.2 ფაკულტეტზე წევრთა სტუდენტური თვითმმართველობის კრება იწვევა ორ წელიწადში ერთხელ ან სტუდენტური თვითმმართველობის პარლამენტის გადააწყვეტილებით, რომელიც:
  - ა) ირჩევს სტუ-ს ინსტიტუტების (ფაკულტეტების) სტუდენტური თვითმმართველობის თავმჯდომარეებს.
  - ბ) განიხილავს სტუდენტური ცხოვრების უმთავრეს საკითხებს.
- 11.3 საინსტიტუტო (საფაკულტეტო) სტუდენტური თვითმმართველობის ხელმძღვანელობას უწევს ინსტიტუტის (ფაკულტეტის) სტუდენტური თვითმმართველობის თავმჯდომარე.

## **მუხლი 12. თვითმმართველობის ფინანსები და კონტროლი**

თვითმმართველობის დაფინანსების წყაროებია:

- ა) უნივერსიტეტის ბიუჯეტიდან და სპეც-სახსრებიდან მიღებული შემოსავალი;
- ბ) ნებაყოფლობითი შემოწირულობები;
- გ) თვითმმართველობის ძირითადი და მიზნობრივი პროექტებისა და პროგრამების რეალიზაციით მიღებული შემოსავლები;
- დ) მესამე პირის მიერ გადმოცემული ქონება.

## **მუხლი 13. საკონსულტაციო საბჭო**

თვითმმართველობის ამოცანების განხორციელების პროცესში თვითმმართველობის პრეზიდენტს, სტუდენტური პარლამენტის უმრავლესობის თანხმობით შეუძლია შექმნას საკონსულტაციო საბჭო. ასეთ ორგანოში შეიძლება გაერთიანდნენ ისინიც, ვინც არ არიან თვითმმართველობის წევრები.

## **მუხლი 14. სარევიზიო კომისია**

13.1. თვითმმართველობის პრეზიდენტის, პარლამენტის, აღმასრულებელი კომიტეტის და დეპარტამენტების მიერ დანიშნული (დამტკიცებული) თანამდებობის პირების მიერ თვითმმართველობის დებულების შესრულებისა და ფინანსური სახსრების თუ სხვა ქონების მიზნობრივად გამოყენებაზე კონტროლს ახორციელებს თვითმმართველობის სარევიზიო კომისია.

13.2. იგი ასევე ვალდებულია უზრუნველყოს სტუდენტური თვითმმართველობის საქმიანობის საჯაროობა.

13.3. სარევიზიო კომისია შედგება შვიდი წევრისაგან.

13.4. სარევიზიო კომისიაში თითო-თითო წევრს წევრთა სიითი შემადგენლობის უმრავლესობით ირჩევენ ფაკულტეტები. ხოლო მეშვიდე წევრს სტუდენტური თვითმმართველობის პრეზიდენტის წარდგინებით ამტკიცებს სტუდენტური პარლამენტი.

13.5. სარევიზიო კომისია თავისი შემადგენლობიდან ხმათა უმრავლესობით ირჩევს სარევიზიო კომისიის თავმჯდომარეს.

13.6. სარევიზიო კომისია თავისი უფლებამოსილების ვადით არჩევიდან 10 დღის განმავლობაში საკუთარ წევრთაგან ირჩევს თავმჯდომარეს. სარევიზიო კომისია მუშაობს მის მიერ შემუშავებული დებულებით.